

- भारतीय संविधान रा निर्माता बाबा साहेब डॉ. भीम राव अंबेडकर री जयंती माथे देश वां ने श्रिद्धापूर्वक याद कर रह्यो है।
- मुख्यमंत्री भजन लाल शर्मा कह्यो-डॉ. अम्बेडकर समाज रा सगळा वर्गा रे उत्थान खातिर काम कर्यो-श्री शर्मा पेंशन अर पालनहार योजना रा लाभार्थियां ने एक हजार 363 करोड़ रिप्यां री रकम ट्रांसफर करी।
- प्रधानमंत्री नरेन्द्र मोदी ने कह्यो- नीति निर्माण में महिलावां री सक्रिय भागीदारी बरस 2047 ताई विकसित भारत रो लगस हासिल करणे मांय सहायक सिद्ध व्हेली।
- प्रदेश मांय गर्मी रो असर बध्यो-राज्य रा घणखर ठौड़ां मांय लारला चौबीस घंटां मांय अधिकतम तापमान मांय 2 सूं 3 डिग्री सेल्सियस री बधोतरी।

000

राष्ट्र, आज संविधान निर्माता भारत रत्न डॉ. भीमराव अम्बेडकर री 135 वीं जयंती माथे वां ने श्रिद्धांजलि अर्पित कर रह्यो है। राष्ट्रपति द्रौपदी मुर्मु, प्रधानमंत्री नरेन्द्र मोदी अर गृहमंत्री अमित शाह बाबा साहेब डॉ. भीमराव अंबेडकर री जयंती माथे वां ने श्रिद्धांजलि अर्पित करी है। इण मौके माथे नुवी दिल्ली में केन्द्रीय विधि अर न्याय राज्य मंत्री अर्जुन राम मेघवाल स्वच्छता अभियान मांय भाग लियो अर वृक्षारोपण कर्यो। प्रदेश मांय भी जयपुर समेत न्यारा-न्यारा शहर-कस्बों मांय डॉ. अम्बेडकर री जयंती श्रिद्धापूर्वक मनाई जा री है। राजधानी जयपुर मांय राखीज्या राज्य स्तरीय जळसा मांय मुख्यमंत्री भजनलाल शर्मा, सामाजिक सुरक्षा अर विकास सूं जुड़ी केई सेवावां अर पहल ने जनता ने समर्पित कर्यो। इण मौके माथे आप रा संबोधन मांय मुख्यमंत्री बाबा साहेब रे कृतित्व अर व्यक्तित्व माथे प्रकाश डालता थकां कह्यो की डॉक्टर अम्बेडकर वंचितां रे साथे ही समाज रे सगळे तबका रे उत्थान खातिर काम कर्यो है।

कार्यक्रम मांय मुख्यमंत्री पेंशन अर पालनहार योजना रा लाभार्थियां ने 1 हजार 363 करोड़ रिप्यां री रकम ट्रांसफर करी।

वणा प्रदेशभर मांय 10 छात्रावासां रो लोकार्पण अर 17 छात्रावासां रो शिलान्यास कर्यो। इण रे चालता एआई आधारित हेल्प डेस्क समाधान साथी रो शुभारंभ कर्यो गयो अर जयपुर रा जामडोली थापित स्वयं सिद्धा परिसर मांय लाइब्रेरी रो वर्चुअल उद्घाटन भी कर्यो गयो। जळसा मांय उपमुख्यमंत्री दिया कुमारी अर डॉ. प्रेमचंद बैरवा समेत राज्य मंत्रिमंडल रा मंत्री अर जनप्रतिनिधि मौजूद रह्या। इण सूं पैल्या मुख्यमंत्री जयपुर थापित अम्बेडकर सर्किल माथे बाबा साहेब री मूर्ति पर पुष्प अर्पित कर श्रिद्धांजलि दी। वठिने, बी.आर. अम्बेडकर जयंती समारोह समिति री कानी सूं जयपुर रे बिड़ला ऑडिटोरियम मांय राखीज्या कार्यक्रम मांय राज्यपाल हरिभाऊ बागडे शिरकत करी। जळसा मांय बोलता थकां श्री बागडे कह्यो बाबा भीमराव अम्बेडकर व्यक्ति नी अपणे आप मांय संस्था हा। वणा देश ने समरसता रो मंत्र ही नी दियो बल्कि राष्ट्र ही सर्वोच्च है आ दृष्टि भी दी। कार्यक्रम मांय शिक्षा मंत्री मदन दिलावर समेत न्यारा-न्यारा प्रतिनिधि मौजूद रह्या। अजमेर मांय राखीज्या डॉ. भीमराव अम्बेडकर री जयंती जळसे मांय भेळा होणे रे पाछे विधानसभा अध्यक्ष वासुदेव देवनानी कह्यो कि डॉ. अम्बेडकर आप रो पूरो जीवन दलितां रे उत्थान खातिर समर्पित कर दियो।

चित्तौड़गढ, कोटा, डूंगरपुर, नागौर, सिरोही, अजमेर, डीग, अलवर, बांसवाड़ा, चूरु और बाडमेर समेत केई दूजा शहर-कस्बां मांय बाबा साहेब ने श्रिद्धापूर्वक याद कर्यो गयो। न्यारा-न्यारा सामाजिक संगठनों भी वां ने भावपूर्ण श्रिद्धांजलि दी।

बिहार मांय भाजपा विधायक दल रा नेता रे रूप मांय सम्राट चौधरी ने चुण्यो गयो है। इण सूं राज्य मांय आगला मुख्यमंत्री बणणे खातिर वाणो रास्तो साफ हो गयो है। इण री घोषणा पटना मांय राष्ट्रीय जनतांत्रिक गठबंधन— एनडीए विधायक दल री एक बैठक रे पाछे करी ज्यी। केन्द्रीय पर्यवेक्षक रे रूप मांय नियुक्त कर्या गया केन्द्रीय कृषि मंत्री शिवराज सिंह चौहान कह्यो की सम्राट चौधरी ने सर्वसम्मति सूं विधायक दल रो नेता चुण्यो गयो है। मुख्यमंत्री रा रूप मांय नीतीश कुमार रो इस्तीफा देणे रे पाछे इण री घोषणा व्ही। नितिश कुमार ने हाल ही मांय राज्यसभा रो सदस्य बणायो गयो है। विधायक सम्राट चौधरी वाणे माथे विश्वास राखणे खातिर भाजपा नेतृत्व रे प्रति आभार जतायो है। एक सोशल मीडिया मांय वणा कह्यो की आ जिम्मेदारी बिहार रे लोगां री सेवा करणे रो ओ चोखो मौको है।

प्रधानमंत्री नरेन्द्र मोदी कह्यो है कि महिलावां रे नीति—निर्माण अर निर्णय लेणे मांय सक्रिय भागीदारी सूं बरस 2047 ताई विकसित भारत री यात्रा रो दृष्टिकोण और मजबूत व्हेला। भारत री नारी शक्ति रे लिख्या पाना मांय श्री मोदी कह्यो कि 16 अप्रैल ने संसद, नारी शक्ति वंदन अधिनियम सूं जुड़्योड़ा महती संवैधानिक संशोधन माथे चर्चा अर बिने पारित करणे खातिर दुबारा सत्र सुरू करेली। प्रधानमंत्री सदन मांय विधेयक रे पारित होणे री आस जतायी है। वणा कह्यो की देशभर री महिलावां विकसित भारत रे निर्माण मांय योगदान देणे रो एक अनूठो मौको मिलने परा खुशी जता री है। प्रधानमंत्री कह्यो की यदि 2029 के लोकसभा चुनाव अर न्यारा—न्यारा विधानसभा चुनाव, महिलावां खातिर पूरी तरह सूं लागू होवे है तो देश रो लोकतंत्र और बत्ती मजबूत और जीवंत व्हेला।

000

प्रधानमंत्री नरेन्द्र मोदी उत्तराखण्ड मांय पूरे बरस पर्यटन ने बधावो देवण रे माथे बल दियो है। देहरादून मांय दिल्ली—देहरादून आर्थिक गलियारा रे उद्घाटन कार्यक्रम मांय बोलता थकां श्री मोदी कह्यो की राज्य री अर्थव्यवस्था खातिर 12 म्हीने रो पर्यटन निर्णायक है। वणा शीतकालीन पर्यटन खातर एक गंतव्य, शीतकालीन खेल अर डेस्टिनेशन वेडिंग रे रूप मांय देश री बधती लोकप्रियता रो जिकर कर्यो। कैलाश अर ओम पर्वत री आप री 2023 री यात्रा रा बारा मांय बताता थकां श्री मोदी कह्यो की जदे सूं श्रिद्धालुओं की तादाद मांय काफी बधोतरी व्ही है। इण सूं स्थानीय निवासियां खातिर आजीविका रा मौका बणे है। दिल्ली—देहरादून आर्थिक गलियारा रे फायदे रो जिक करता थकां प्रधानमंत्री कह्यो कि इण सूं सैलाणियां री बधती तादाद, आतिथ्य, परिवहन अर दूजा स्थानीय सेवावां सूं जुड़्या लोगां री आय बधेला।

.....  
वणा आवता कुम्भ मेळे रो जिक करता थकां कह्यो की धार्मिक मौका माथे उत्तराखण्ड मांय घणी तादाद मांय आवण री आस करी जा री है। प्रधानमंत्री कह्यो की उत्तराखण्ड री प्राकृतिक सुन्दरता अर पवित्रता ने संरक्षित करणो पर्यटन ने बणाये राखणे खातिर जरूरी है।

000

प्रदेश रा व्यापारियां ने बधावो देवण खातिर लाई गयी **राजस्थान ट्रेड प्रमोशन पॉलिसी—2025** रा तैत ऑनलाइन आवेदन शुरू कर दिये गया है। **आवेदक, एसएसओ आईडी या ई—मित्र** रे जरिये विभागीय वेबसाइट माथे आवेदन कर सके हैं। ईण नीति रा तैत खुदरा व्यापारिया ने 2 करोड़ रिप्यां ताई रो ऋण मुहैया करायो जावेला। इण रे माथे राज्य सरकार 6 फीसदी ताई ब्याज अनुदान अर इंश्योरेंस प्रीमियम माथे 50 फीसदी ताई सहायता समेत दूजा लाभ देवेली। उद्योग अर वाणिज्य मंत्री कर्नल राज्यवर्धन सिंह राठौड़ बतायो कि व्यापार क्षेत्र मांय इण प्रकार री नीति पैली बार लाई ज्यी है। इण रो लगस प्रदेश रे

छोटे व्यापारियों बड़े ट्रेड, ई-कॉमर्स प्लेटफॉर्म अर लॉजिस्टिक नेटवर्क जेडा मौका मुहैया करानो है। इण सूं व्यापार क्षेत्र मांय निवेश वृद्धि होणे रे साथै ही रोजगार रा नुवा मौका भी मिलेला। इण सूं प्रदेशभर रा साढे 10 लाख सूं बत्ती खुदरा व्यापारियां ने फायदो मिलेला।

000

राजस्थान पुलिस थापना दिवस रा मौके माथे आज तीन दिवसीय जळसे री सरुआत व्हेली। समारोह रा तैत जयपुर रा अल्बर्ट हॉल माथे राजस्थान पुलिस रा बैंड दल प्रस्तुति देवेला। पुलिस अर जनता रे बीचे री दूरी ने कम करणे रे लगय सूं राखीज्या अ कार्यक्रम अब सूं कुछ देर पाछे सरु व्हेला जका सवा आठ बज्या ताई चालेला। इण कार्यक्रम मांय पुलिस बैंड सदस्य आप री विशेष अर पारंपरिक बैंड ड्रेस में सुसज्जित नजर आवेला।

000

वैशाखी रो पर्व आज देशभर मांय श्रिद्धा अर उच्छास सूं मनायो जा रहयो है। इण मौके माथे राष्ट्रपति द्रौपदी मुर्मू, उपराष्ट्रपति सी. पी. राधाकृष्णन अर प्रधानमंत्री नरेंद्र मोदी शुभकामनाएं दी हैं। सोशल मीडिया पोस्ट माथे श्री मोदी कहयो कि ओ जीवंत त्योहार कृतज्ञता, नवजीवन अर आशा री भावना रो प्रतीक है अर वा किसानां री कड़ी मेहनत रे प्रति सम्मान है जिण री लगन सूं देश ने भोजन मिले है। प्रधानमंत्री **तमिल नव वर्ष पुथंडू** रे मौके माथे शुभकामनाएं दीं। वठिने प्रदेश मांय भी वैशाखी पर्व ने ले र पंजाबी अर सिख समुदाय रा लोगां मांय खासो उच्छास देख्यो जो रहयो है। वैशाखी रो धार्मिक, सांस्कृतिक अर ऐतिहासिक महत्त्व भी है। इणी दिन बरस 1699 मांय सिख धर्म के दसवें गुरु श्री गुरु गोविंद सिंह जी खालसा पंथ री थापना करी ही। गुरुद्वारां मांय इण मौके माथे खास आयोजन हो रहया है। लंगर प्रसादी साथै शबद कीर्तन रा पाठ हो रिया है। पाली मांय सूरजपोल थापित गुरुद्वारा मांय अखण्ड पाठ रे साथै गुरु री महिमा रो गुणगान कर्यो गयो अर लंगर रो आयोजन व्हयो।

000

प्रदेश मांय गर्मी रो असर बधण लाग्यो है। लारला चौबीस घंटां मांय घणखर ठौड़ा माथे अधिकतम तापमान मांय 2 सूं 3 डिग्री सैल्सियस री बधोतरी दरज करी ज्यी है। सबसूं बत्ती 41 दशमलव 8 डिग्री सैल्सियस बत्ती तापमान बाड़मेर मांय दर्ज कर्यो गयो है। बाड़मेर मांय आज तेज गर्मी अर लू रे असर सूं जनजीवन प्रभावित रियो। इण बीचे न्यारा-न्यारा सामाजिक संगठनां री कानी सूं परिन्डा लगाया गया। वठिने सिरोही ज़िले मांय थापित राज्य रा एकमात्र पर्वतीय पर्यटन स्थल माउंट आबू मांय तापमान कम रहणे सूं मौसम सुहावनो बण्योड़ो है। मौसम केन्द्र जयपुर आगले 4-5 दिन प्रदेश मांय घणकर ठौड़ां माथे मौसम सुखो रहेणे अर अधिकतम तापमान मांय और 2-3 डिग्री सैल्सियस ताई री बधोतरी होणे री आस जतायी है। 17-18 अप्रैल ने पश्चिमी राजस्थान जोधपुर अर बीकानेर संभाग रे कुछ एक ठौड़ां मांय अधिकतम तापमान 42 सूं 44 डिग्री सैल्सियस दर्ज होणे अर कठे-कठे लू चालणे री संभावना है।

000

इंडियन रेलवे कैटरिंग एंड टूरिज्म कॉरपोरेशन नौ मई सूं भारत गौरव टूरिस्ट ट्रेन सरु कर रहयो है। आ ट्रेन श्रीगंगानगर सूं रवाना हो र न्यारा-न्यारा टेशनां सूं यात्रियां ले र 11 दिन मांय देश रा केई प्रमुख धार्मिक स्थलां ताई जावेली। 19 मई ने यात्रा पूरी व्हेली। ट्रेन रो मार्ग श्रीगंगानगर सूं शुरु हो र हनुमानगढ़, चूरु, सीकर, रींगस, जयपुर, भरतपुर, मथुरा, आगरा कैंट, ग्वालियर, झांसी अर कानपुर रहवेला। आई.आर.सी.टी.सी. जयपुर रा महाप्रबंधक योगेंद्र सिंह गुर्जर बतायो के श्रिद्धालुआं री मांग ने देखता थकां ओ ट्रेन यात्रा कार्यक्रम तय कर्यो गयो है जिण सूं एक ही पैकेज मांय केई बड़ा धार्मिक स्थलां रा दर्शन कराया जा सके है।

000

केन्द्र सरकार राष्ट्रीय राजमार्गों माथे अतिभारित वाहनां खातिर शुल्क वसूली को बेहतर अर तर्कसंगत बणाणे खातिर राष्ट्रीय राजमार्ग शुल्क चौथा संशोधन नियम, 2026 अधिसूचित कर्यो है। सड़क परिवहन अर राजमार्ग मंत्रालय कह्यो की इण संशोधन रो लगस तैय भार सीमा रो अनुपालन पक्को करणो है, सड़क सुरक्षा बढ़ाणो अर राजमार्ग अवसंरचना री रक्षा करणो है। संशोधित नियम काले सूं लागू व्हेला। संशोधित नियमां रा तैत बत्ती भार ले जावण वाळा वाहनां माथे अतिभार रे फीसदी रा आधार माथे शुल्क लगायो जावेला। 10 फीसदी ताई अतिरिक्त भार वाला वाहनां माथे कोई अतिभार शुल्क नी लागेला। इण संशोधन सूं अनुपालन मांय सुधार, ओवरलोड वाहनां रे कारण होवण वाळा सड़क हादसा मांय कमी अर राष्ट्रीय राजमार्गों माथे माल री सुरक्षित अर बत्ती कुशल आवाजाही ने बधावा मिलणे री आस है।